

直齋書錄解題

四

昌410

5315

部-4

直齋書錄解題卷五

宋 陳 振 孫 撰

詔令類

西漢詔令十二卷

吳郡林慮德祖編采括志傳參之本紀以示信安程  
俱致道俱以世次先後各爲一卷差比歲月纂而成  
書且爲之序慮嘗試中詞學爲開封府掾尹以佞幸  
進有所不樂引疾納祿去遂終於家

東漢詔令十一卷

直齋書錄解題

卷五



宗正寺主簿鄞樓昉叔編大抵用林氏舊體自爲之序帝王之制具在百篇後世不可及矣兩漢猶爲近古愚未冠時無書可觀雖二史亦從人借嘗於班書志傳錄出諸詔與紀中相附以便覽閱既仕於越乃得見林氏書而樓氏書近出其爲好古博雅斯以勤矣惟平獻二朝莽操用事如錫莽及廢伏后之類皆當削去莽時尤多也

本朝大詔令二百四十卷

寶謨閣直學士

案原本誤作實錄閣今據文獻通攷改正

豫章李大異伯

珍刻於建寧云紹興間宋宣獻家子孫所編纂也而不著其名始自國初迄於宣政分門別類凡目至爲詳也

玉堂制草十卷

參政鉅野李邴漢老編承平以前制誥

中興玉堂制草六十四卷

同知樞密鄱陽洪遵景嚴編起建炎迄紹興末

中興續玉堂制草三十卷

丞相益文忠公東里周必大子充爲學士院時編進

始嘗進言加上德壽尊號不以表而以議且稱嗣皇帝爲非是遂革之今書以尊號表爲卷首而增附館職策問於後起隆興迄淳熙改元自後未有續者

綸言集三十一卷

宇文粹中虛中兄弟所編集

中興綸言集二十八卷

左司郎中莆田鄭寅子敬編寅知樞密院僑之子靖重博洽藏書數萬卷於本朝典故尤熟

僞史類

淝上英雄小錄二卷

信都鎬撰

案鄭樵通志作僞吳信都鎬撰

所錄楊行密將吏有勲名

者四十人其二十四人皆淝上餘諸道人又有僧道漁樵之屬十人錄其小事故名小錄

江淮異人錄二卷

吳淑撰所紀道流俠客術士之類凡二十五人

南唐烈祖開基誌十卷

南唐滁州刺史王顏撰起天祐乙丑止昇元癸卯合三十九年

南唐烈祖實錄十三卷

南唐史館修撰高遠撰闕第八第十二卷遠又嘗為吳錄二十卷而徐鉉鄭文寶皆云開寶中遠始緝昇元以來事書未成而疾悉焚其草故事多遺落

江南錄十卷

給事中廣陵徐鉉鼎臣光祿卿池陽湯悅德川撰二人皆唐舊臣故太宗命之撰次悅卽殷崇義避宣祖諱及太宗舊名并姓改焉

南唐近事二卷

工部郎江南鄭文寶撰序云三世四十年起天福己

酉終開寶乙亥

案宋太祖在位十七年首庚申盡丙子乙亥乃開寶八年原本作己亥誤

今改正然泛記雜事實小說傳記之類耳

江表志三卷

鄭文寶撰序言徐鉉湯悅所錄事多遺落無年可編然前錄固為簡略而猶以年月紀事今此書亦止雜記如事實之類爾近事稱太平興國二年丁丑今稱庚戌者大中祥符三年也

南唐書三十卷

陽羨馬合撰序言其祖太博元康世家金陵多知南唐故事未及撰次今纂先志而成之實崇寧乙酉其書略備紀傳體而亦言徐鉉湯悅之疎略云

江南餘載二卷

不著姓名序言徐鉉始奉詔爲江南錄其後王舉路振陳彭年楊億皆有書大概六家皆不足以史稱而龍衮爲尤甚熙寧八年得鄭君所述於楚州其事迹有六家所遺或小異者刪落是正取百九十五段以類相從鄭君者莫知何人豈卽文寶也耶

新修南唐書十五卷

寶謨閣待制山陰陸游務觀撰采獲諸書頗有史灋

前蜀紀事二卷

後蜀學士毛文錫平珪撰起廣明庚子盡天福甲子凡二十五年文錫唐太僕卿龜範之子十四登進士第入蜀仕建至判樞密院隨衍入洛而卒

後蜀紀事二卷

直史館太常博士董淳撰惟記孟昶事

蜀檣杙十卷

殿中侍御史裏行新建張唐英次功撰唐英自號黃松子商英天覺之兄也

吳越備史九卷

吳越掌書記范垌巡官林禹撰按中興書目其初十二卷盡開寶三年後又增三卷至雍熙四年今書止石晉開運比初本尙闕三卷

吳越備史遺事五卷

全州觀察使錢儼撰俶之弟也其序言備史亦其所作託名林范而遺名墜迹殊聞異見闕漏未盡者復

爲是編時皇宋平南海之二年吳興西齋序蓋開寶五年也儼以三年代其兄儻刺湖州

閩中實錄十卷

周顯德中揚州永貞縣令蔣文暉記王審知父子及將吏儒士僧道事迹末亦畧及山川土物

閩王列傳一卷

秘書監晉江陳致雍撰二世七主通六十年

閩王事迹一卷

不知何人作卷末稱光啓二年至天聖九年一百三

十八年其所記頗詳案閩亡於五代之末其世紀不得至天聖九年疑有誤

三楚新錄三卷

知貴州修仁縣周羽冲撰上卷為湖南馬殷中卷為武陵周行逢下卷為荆南高季興

湖南故事十卷

不知作者記馬氏至周行逢事館閣書目作十三卷蓋為列傳十三篇其實十卷也文辭鄙甚

五國故事二卷

不知作者記吳蜀閩漢諸國事

九國志五十一卷

右正言知制誥祁陽路振子發撰九國者謂吳唐二蜀東南二漢閩楚吳越各為世家列傳凡四十九卷末二卷為北楚書高季興事張唐英所補撰也

十國紀年四十卷

劉恕撰十國者即前九國之外益以荆南張唐英所謂北楚也

天下大定錄一卷

殿中丞通判桂州王舉撰景祐間人始高季興終劉

繼元其所記疎畧獨江南稍詳書本十卷今但為一卷恐非全書也

陰山雜錄十六卷

不著名氏莆田鄭氏書目云趙志忠撰志忠者遼中書舍人得罪於宗真挺身來歸歐公歸田錄云志忠本華人自幼陷虜為人明敏在虜中舉進士至顯官歸國能述虜中君臣世次山川風物甚詳今觀此書可概見矣

燕北雜錄五卷西征寨地圖附

思卿武珪記嘉祐六年宮苑使知雄州趙案此處原本闕一字進於朝珪自契丹逃歸事見國史傳

契丹錄一卷

郎陰山雜錄之首卷也

匈奴須知一卷

歸明人田緯編次錄契丹地理官制

辨鳩錄一卷

不著名氏契丹譯語也凡八篇

虜廷須知一卷

左藏庫副使知安肅軍陳昉撰熙寧元年集賢校理鄭穆為之序凡二十一條目

案文獻通攷作胡穆為之序

西夏須知一卷

內殿承制鄜延都監劉溫潤撰凡十五條目

金人亡遼錄二卷

燕山史愿撰或稱遼國遺事

松漠記聞二卷

徽猷閣直學士鄱陽洪皓光弼撰皓奉使留敵中錄

所聞雜事

征蒙記一卷

金人明威將軍登州刺史李大諒撰建炎鉅寇之了隨其父成降金者也所記家人跳梁自其全盛時已

不能制矣

金國志二卷

承奉郎張棣撰淳熙中歸明人記金國事頗詳

金國志一卷

不著名氏似節略張棣書其末又雜錄金國事宜及海陵以後事

直齋書錄解題 卷五  
金國節要三卷

右從事郎堯人張匯東卿撰宣和中隨父官保州陷金十五年至紹興十年歸朝

偽楚錄二卷

不著名氏

偽齊錄二卷

不著名氏

金人南遷卷錄一

稱偽著作郎張師顏撰頃初見此書疑非北人語其

間有曉然傳會者或曰華岳所爲也近扣之汴人張總管翼則云歲月皆牴牾不合益證其妄

雜史類

越絕書十六卷

無撰人名氏相傳以爲子貢者非也其書雜記吳越事下及秦漢直至建武二十八年蓋戰國後人所爲而漢人又附益之耳越絕之義曰聖人發一隅辯士宣其辭聖文越於彼辯士絕於此故題曰越絕雖則云然而終未可曉也

越者國之氏也絕者絕也謂勾踐時也絕者絕也絕惡反之於善越專其功故曰越絕並見本書 文簡

批編尾云越絕書譌不可讀如樂架之有啞鍾漁父

辭劍事見於此書

隨齋批注

戰國策三十卷

司馬遷史記所本劉向所校者也但無撰人名氏後

漢高誘注自東周至中山十二國凡三十三篇

鮑氏校定戰國策十卷

尚書郎括蒼鮑彪注以西周正統所在易為卷首其

注凡四易藁乃定

九州春秋九卷

晉司馬彪紹統撰漢末州部之亂司冀徐兗青荆揚

梁幽凡盜賊僭叛皆紀之

華陽國志二十卷

案唐書藝文志華陽國志作十三卷

晉散騎常侍蜀郡常璩道將撰志巴蜀地理風俗人

物及公孫述劉焉劉璋先後主以及李特等事迹未

卷為序志云肇自開闢終乎永和三年

原註劉璋乃焉之子

後魏國典三十卷

唐太常少卿元行沖撰元沖以系出拓跋乃撰魏興三十篇文約事詳學者尙之此本從莆田劉氏借錄卷帙多寡不同歲月首尾不具殆類鈔節似非全書大業雜記十卷

唐著作郎杜寶撰紀煬帝一代事序言貞觀修史未盡實錄故爲此書以彌縫闕漏

建康實錄二十卷

唐許嵩撰載吳晉宋齊梁陳六朝都建康者編年附傳大畧用實錄體

行在河洛記十卷

唐宰相尉氏劉仁軌正則撰記李密王世充事末二卷記隋都城宮殿池苑按唐志作行年記二十卷

河洛春秋二卷

唐洋州司功包諝撰記安史之亂

明皇雜錄一卷

唐校書郎鄭處誨撰雜記明皇時事大中九年序處誨太和八年進士也

開天傳信記一卷

唐吏部員外郎鄭棨撰雜記開元天寶時事

安祿山事迹三卷

唐華陰尉姚汝龍撰

案唐書藝文志作姚汝能

開元昇平源一卷

唐史官吳兢撰叙姚崇十事

廬陵王傳一卷

唐彭王傅會稽徐浩季海撰叙狄仁傑五王事

奉天錄四卷

唐趙元一撰起建中四年涇原叛命終興元元年克

復神都

燕南記三卷

唐恒州司戶魏郡谷况撰專記成德一鎮事自建中

二年至太和七年起張孝忠

案唐書建中二年九月李納陷宋州李惟岳將

張孝忠以易定二州降原本作張志忠誤今改正

終王承元古語有燕南垂

趙北際今以其在燕之南故名然河北諸鎮連叛事

迹大略具矣

建中河朔記六卷

唐李公佐撰序言與從弟正封讀國史至建中貞元

之際序述河朔故事未甚詳備以舊聞於老僧智融及谷况燕南記所說略同參錯會要以補史闕

邠志三卷 案唐書藝文志作二卷

唐殿中侍御史凌準宗一撰邠軍即朔方軍也此本從盱江晁氏借錄其末題曰文忠修唐史求此書不獲今得於忠憲范公之孫伯高其中尚多誤當訪求正之紹興乙丑晁公鄮

涼國公平蔡錄一卷

唐山南東道掌書記鄭澥蘊士撰涼國公者李愬也

國史補三卷

唐學士李肇撰

大唐新語十三卷

唐江都縣主簿劉肅撰自武德迄大歷分類編纂凡三十類元和丁亥歲序

太和野史三卷

不著名氏但稱大中戊辰陳郡袁濤序自鄭注而下十七人本共為一軸濤分之為三卷

太和摧兇記一卷

文與上同而不分卷豈其初本耶

野史甘露記二卷

不著名氏上卷記甘露之禍下卷叙諸臣本末

乙卯記一卷

唐布衣李潛用撰末又有吳郡李寔者述訓注本謀

附益之乙卯者太和九年也

兩朝獻替記三卷

唐宰相李德裕文饒撰叙文武兩朝相位奏對事迹

會昌伐叛記一卷

李德裕撰記平澤潞事

次柳氏舊聞一卷

李德裕撰記柳芳所聞於高力士者凡十七條上元

中芳謫黔中力士徙巫州芳從力士問禁中事德裕

父吉甫從芳子晁聞之

四夷朝貢錄十卷

唐給事中渤海高少逸撰會昌中宰相李德裕以黠

憂斯朝貢莫知其國本原詔為此書凡二百一十國

本二十卷合之為十卷

東觀奏記三卷

唐右補闕裴延裕

案文獻通攷作裴延裕

膺餘撰記宣宗朝事

凡八十九條

貞陵遺事二卷續一卷

唐中書舍人令狐澄撰吏部侍郎柳玘續之澄所記

十七事玘所續十四事

咸通庚寅解圍錄一卷

唐成都少尹張雲景之撰言南詔圍城扞禦事

金鑿密記三卷

唐翰林學士承旨京兆韓偓致堯撰具述在翰苑時  
事危疑艱險甚矣昭宗屢欲相之卒不果而貶竟終  
於閩非不幸也不然與崔垂休輩駢肩就戮於朱溫  
之手矣

廣陵妖亂志三卷

唐晉陽鄭延晦撰

案唐書藝文志作郭延誨撰

言高駢呂用之畢

師鐸等事

汴水滔天錄一卷

唐左拾遺王振撰言朱溫篡逆事

朱梁興創遺編二十卷

梁宰相馮翊敬翔子振撰自廣明巢賊之亂朱溫事迹迄於天祐弑逆大書特書不以爲愧也其辭亦鄙俚

莊宗召禍記一卷

後唐中書舍人黃彬撰

二朝見聞錄八卷

不知作者起乾符戊戌至天祐末年及莊宗中興後唐河東事跡三朝者僖昭莊也其文直述多鄙俚

大唐補記三卷

南唐程匡柔撰

案馬令南唐書作程匡柔原本作匡柔誤今改正

序言懿宗

朝有焦璐者撰年代紀述神堯止宣宗匡柔襲三百年歷補足十九朝起咸通戊子止癸巳附璐書中乾符以後備存補紀末有後論一篇文辭雖拙論議亦正

賈氏備史六卷

漢諫議大夫賈緯撰叙石晉禍亂每一事爲一詩系之

晉太康平吳記二卷

周兵部尚書張昭撰世宗將討江南昭采晉武平孫皓事迹爲書上之

晉朝陷蕃記四卷

宰相大名范質文素撰據莆田鄭氏書目云爾本傳不載故館閣書目云不知作者未悉鄭氏何所據也

五代補錄五卷

尋陽陶岳撰每代爲一卷凡一百七條岳雍熙二年進士

五代史闕文一卷

翰林學士鉅野王禹偁元之撰

建隆遺事一卷

王禹偁撰其記陳橋驛前戒誓諸將事元出熙陵而序文云近取實錄入禁中親自筆削然則此書之作誠有謂也邵氏聞見錄亦嘗表而出之而或者亦辨此書之僞是見於王明清揮塵錄者尤有據當考

又名篋中記案揮塵錄建隆遺事世稱王元之所述其間率多誣謗之詞如稱趙普盧多遜受遺詔昌陵尤爲舛謬韓王以開寶六年八月免相至太平興國六年九月始再秉衡鈞當太祖升遐時曾政在外

何緣前一日與盧丞相同見於寢又稱太祖長子德昭為南陽王初未嘗有此事且載秦王傳中云云安有淳化三年而見三朝國史耶李燾亦譏此書鄙悖不類禹偁平日之文則此書之非禹偁作益足信也

甘陵伐叛記一卷

題文升撰不知何人末有論稱甘陵人蘇朔為余言

其大父慶歷中陷賊親見則初叛時事原註則蓋按王則也

中興書目有甘陵誅叛錄稱殿中丞王起撰起時為

文彥博幕客然則別自一書也

涑水記聞十卷

司馬光撰此書行於世久矣其間記呂文靖數事呂

氏子孫頗以為諱蓋嘗辨之以為非温公全書而公

之曾孫侍郎伋季思遂從而實之上章乞毀板識者

以為譏

書壬戌事一卷

不知何人作其記永樂之事甚詳

逸史二十卷

丞相楊羨蔣芾子禮撰其曾祖魏公之奇穎叔所記

逸史殆數百冊兵火散失摺據遺藁得六百六十事

為十九門淳熙改元書成為之序

林氏野史八卷

同知樞密院長樂林希子中撰希不得志於元祐起  
從章惇甘心下遷西掖草諸賢謫詞者也而此書記  
熙寧元豐以來事頗平直不類其所爲或言此書作  
於元祐之前其後時事旣變希亦隨之書藏不毀久  
而時事復變其孫懋於紹興中始序而行之耳  
元和錄三卷

池州石埭縣尉維揚馬永錫明叟撰自元和三年牛  
李對策以至大中十三年令狐綯罷相唐朋黨本末

具矣永錫嘗著唐職林實賓錄等書崇觀政和間人  
也又有馬永卿大年者從劉元城游大觀三年進士  
當是其羣從館閣書目以永錫爲唐人大誤也

邵氏辨誣三卷

右奉直大夫河南邵伯溫子文撰專辨紹聖羣小誣  
謗宣仁事本末紹興中其子待制溥上之

邵氏聞見錄二十卷

邵伯溫撰多記國朝事又有後錄三十卷其子溥所  
作不專紀事在子錄小說類

康節兩孫溥博嘗見川本邵氏聞見後錄名博今作溥未知直齋何所據恐博是蓋刊本不應誤也

隨齋批注

國史後補五卷

蔡條撰條京之愛子京末年事皆出條條兄攸既叛父亦與條不咸此書大畧爲其父自解而滔天之惡終有不能隱蓋者其間所載宮闈禁密非臣庶所得知亦非臣庶所宜言旣出條筆事遂傳世殆非人力也

北征紀實二卷

蔡條撰叙伐燕本末歸罪童貫蔡攸亦欲爲京文飾然京之罪不可掩也

靖康要錄五卷

不著撰人名氏自欽廟潛邸迄靖康元年十二月事朝野僉言二卷

不著名氏有序建炎元年八月繫年錄稱夏少曾未詳何人

靖康傳信錄一卷

丞相李綱伯紀撰丁未二月

靖康奉使錄一卷

鄭望之撰

靖康拾遺錄一卷

何烈撰又名草史

孤臣泣血錄三卷拾遺一卷

丁特起撰

裔夷謀夏錄七卷

翰林學士新安汪藻彥章撰

陷燕記一卷

賈子莊撰記燕山初陷事子莊不知其名蔡靖客也

南歸錄一卷

直秘閣沈瑄撰亦記燕山事

靖康錄一卷

太學生朱邦基撰

金人犯闕記一卷

草茅方冠撰

汴都記一卷

無名氏

正齋書錄解題 卷五  
靖康遺錄一卷

太學生沈良撰

靖康野錄一卷

無名氏

避戎夜話一卷

吳興石茂良太初撰

靖康小史一卷

不著名氏其末稱名曰烈卽何烈草史也

痛定錄一卷

不著名氏

悲喜記一卷

圍城中人作書與所親曰中美知府者具述喪亂本末自稱名曰暘皆不知何人也

嘗見一書名皇旋陷虜記中間載秘書少監趙暘與姚太守書云云雖無中美之稱恐卽此書也

隨齋批注

建炎中興記一卷

耿延禧撰

建炎中興日歷五卷

宰相新安汪伯彥廷俊撰叙元帥開府至南都踐極  
呂忠穆答客問一卷

宰相濟南呂頤浩元直撰

呂忠穆勤王記一卷

左宣毅郎臧梓撰記建炎復辟事

渡江遭變錄一卷

丞相上蔡朱勝非藏一撰記苗劉作難至復辟事

建炎復辟記一卷

無名氏

建炎通問錄一卷

宣毅郎傅雱撰建炎初李丞相綱所進

北狩聞見錄一卷

幹當龍德宮曹勛功顯撰勛扈從北狩以徽廟御札

間道走行在所以建炎二年七月至南京

北狩行錄一卷

蔡儻王若冲撰

戊申維揚錄一卷

無名氏

正齋書錄解題 卷五  
維揚過江錄一卷

尚書左丞葉夢得少蘊撰

巳酉航海記一卷

中書舍人李正民撰又名建炎居邠記

建炎假道高麗錄一卷

楊應誠撰取道遼東奉使金虜不達而還

紹興講和錄二卷

無名氏

亂華編三十三卷

知盱眙軍東平劉荀子卿編其前有小序數語云方敬塘割幽燕遺契丹之日孰知爲本朝造禍之原哉逮王安石創新法爲闢國之謀又孰知紹述者召禍之酷哉所集雜史傳記近三十種荀忠肅丞相諸孫也

元祐黨籍列傳譜述一百卷

龔頤正撰以諸臣本傳及誌狀家傳遺事之類集成之其事跡微晦史不可見者則采拾諸書爲之補傳凡三百九人其闕者四人而已淳熙中史院取其書

以修四朝國史洪邁奏乞甄錄補和州文學後賜出身詳見編年類頤正給事中原之曾孫也

紹興正論二卷

序稱瀟湘野夫不著名氏錄文武官不附和議及忤秦檜得罪者

紹興正論小傳二十卷

宗正寺主簿鄞樓昉叔撰以正論中姓名倣元祐黨傳爲之

三朝北盟會編二百五十卷

直秘閣清江徐夢莘商老撰輯諸書二百餘家分上中下上爲政宣二十五卷中爲靖康七十五卷下爲炎興百五十卷

北盟集補五十卷

夢莘以前書詮載不盡者五家續編次於中下二帙以補其闕靖康炎興各爲二十五卷

中興十三處戰功錄一卷

參政眉山李壁季章撰中興以來禦寇立功惟此十三處編爲一書所謂司勳藏其貳者也開禧乙丑北

事將作其書成

建炎以來朝野雜記甲乙集共四十卷

李心傳撰上自帝系帝德朝政國典下及見聞瑣碎皆錄之蓋南渡以後野史之最詳者

西陲泰定錄九十卷

李心傳撰記吳曦叛逆以及削平本末起嘉泰辛酉迄嘉定辛未爲三十七卷其後蜀事益多又增修至辛巳之冬通爲九十卷仍頗用太史公年表例併記國家大政令邊防大節目首尾二十年

典故類

貞觀政要十卷

唐吳兢撰前題衛尉少卿兼修國史按新舊書列傳兢未嘗爲此官而書亦不記歲月但其首稱良相侍中安陽公中書令河東公亦未詳爲何人館閣書目云神龍中所進當攷

魏鄭公諫錄五卷

唐尙書吏部郎中琅邪王綝撰綝字方慶以字行相武后其爲吏部當在高宗時館閣書目作王琳誤也

所錄魏公進諫奏對之語又名魏文貞公故事  
翰林盛事一卷

唐剡尉常山張著處晦撰紀儒臣盛事自武德中迄  
于天寶首載張文成七登科者卽著之祖也

衣冠盛事一卷

唐武功蘇特撰

李司空論事一卷

唐大中史官蔣偕錄司空者李絳深之元和宰相也  
太和辨謗畧三卷

唐宰相李德裕撰初憲宗命令狐楚等爲元和辨謗  
畧十卷錄周秦漢魏迄隋忠賢罹讒謗事迹德裕等  
刪其繁蕪益以唐事裁成三卷太和中上之集賢學  
士裴潏爲之序元和書今不存邯鄲書目亦止有前  
五卷

秦傳玉璽譜一卷

題博陵崔逢修協律郎嚴士元重修河中少尹魏德

謨潤色

案文獻通攷宋史藝文志俱作  
魏德謨原本作德譽誤今改正

國璽傳一卷傳國璽記一卷

傳無名氏所記止唐肅宗記稱嚴士元與前大同小異

玉璽雜記一卷

徐景撰乾元元年七月記唐志有徐景玉璽正錄卽此書也

楚寶傳一卷

杜確撰肅宗乾元二年楚州尼真如獻寶事

八寶記一卷

無名氏大觀二年

唐文宗朝備問一卷

不著名氏雜錄唐朝典故

通典二百卷

唐宰相京兆杜佑君卿撰採五經羣史歷代沿革廢置羣士論議迄於天寶凡爲八門曰食貨選舉職官禮樂兵刑法州郡邊防貞元中表上之李翰爲之序初劉秩爲政典三十五篇佑以爲未盡廣而成之

續通典二百卷

翰林學士承旨大名宋白太素等撰咸平三年奉詔

四年九月書成起唐至德初迄周顯德末王欽若言杜佑通典上下數千載爲二百卷而其中四十卷爲開元禮今之所載二百餘年亦如前書卷數時論非其重複

國朝通典二百卷

不著名氏或言魏鶴山所爲似方草創未成書也凡通典會要前志及館閣書目皆列之類書按通典載古今制度沿革會要專述典故非類書也

唐會要一百卷

司空平章事晉陽王溥齊物撰初唐德宗時蘇冕撰四十卷武宗朝崔鉉續四十卷至是溥又采宣宗以降故事共成百卷建隆二年正月上之按唐志蘇冕會要四十卷續會要四十卷楊紹復等撰崔鉉監修而會要稱杭州刺史蘇弁與兄冕纂國朝故事爲是書弁聚書至二萬卷次於集賢芸閣弁字元容武功人武后宰相良嗣之從孫冕仕爲京兆士曹弁判度支以腐粟給邊坐貶冕亦廢

五代會要三十卷

王溥撰

六朝國朝會要三百卷

監修國史華陽王珪禹玉撰始仁宗命纂修自建隆至慶歷四年成八十五卷熙寧三年珪為學士承旨

乞續修至熙寧十年總二十一類八百五十五門

案

獻通攷作總一十一類八百五十八門

舊書亦略增損為三百卷

政和重修國朝會要百十卷

先是王禹玉監修自建隆至熙寧凡三百卷崇寧中重修僅成吉禮百十卷政和進呈餘四類編治垂成

宣和庚子罷局遂成散漫紹興間少蓬程俱申請就知桂州許中家借抄之許中嘗與崇寧修書故存此本得以備中禁之採錄今重修本題淮康軍節度使充禮制局詳議官蔡攸等奉勅重修續會要三百卷

監修仙井虞允文并甫等上自紹興十年編修起元豐元年迄靖康之末乾道六年書成

中興會要二百卷

監修晉江梁克家叔子等上乾道六年既進續會要

有旨自建炎元年續修正紹興三十二年九月成書  
國朝會要總類五百八十八卷

李心傳所編合三書為一刻於蜀中其板今在國子  
監

三朝寶訓三十卷

翰林學士李淑等撰天聖五年監修國史青社王曾  
孝先奏乞用唐吳兢貞觀政要故事取三朝聖語政  
事及臣僚奏對不入正史者別為一書與國史實錄  
並行至十年書成詔以寶訓為名其後進讀於爾英

延義今館閣書目以為二十卷富弼所上者非也乃  
政要爾

三朝訓鑑圖十卷

學士李淑楊偉等修纂慶歷八年偉初奉旨檢討三  
朝事迹乞與淑共編且乞製序皇祐元年書成頃在  
莆田有售此書者亟求觀之則已為好事者所得蓋  
當時御府刻本也卷為一冊凡十事事為一圖飾以  
青赤亟命工傳錄凡字大小行廣狹設色規模一切  
從其舊斂衽鋪觀如生慶歷皇祐間目觀聖作明述

之盛也按館閣書目載此書云繪采皆闕至續書目乃云得其全未知果當時刻本乎抑亦摹傳也

三朝政要二十卷

宰相河南富弼彥國撰慶歷三年弼為樞副上言選官置局以三朝典故分門類聚編成一書以為模範命王洙余靖孫甫歐陽修同共編纂四年書成名太平故事凡九十六門每事之後各釋其意至紹興八年右朝議大夫呂源得舊印本刊正增廣名政要釋明策備上之於朝館閣書目指政要為寶訓非也

兩朝寶訓二十卷

禮部郎中長樂林希子中編進用天聖故事也元豐六年表上

仁皇訓典六卷

翰林侍講范祖禹撰元祐八年經筵所上凡三百十七條大畧亦用寶訓體

歷代年號并宮殿等名一卷

丞相饒陽李昉明叔在翰苑時所纂

朝制要覽五十卷

屯田郎中宋咸撰此書傳於陸放翁氏放翁書其後曰先君會稽公晚歲喜觀間爲子弟講論因革率至夜分會稽公者其父宰元鈞也其書作於嘉祐中皆國初故實觀之使人有感焉

景德會計錄六卷

丞相吳郡丁謂謂之撰時爲三司使序言歲收兩京十七路帳籍四萬四百有七日入疾徐事一千五百文移倍之倣李吉甫國計簿賈耽國要圖總其目得四十列爲六卷一戶賦二郡縣三課入四歲用五祿食六雜記大抵取景德中一年爲準

皇祐會計錄六卷

樞密信都田况元均權三司使時所撰倣景德之舊取一歲最中者爲準又爲儲運一篇以補其闕

春明退朝錄三卷

龍圖閣直學士常山宋敏求次道撰所記多故實其父宣獻公綬居第在春明坊如晁氏稱昭德也

先朝政範一卷

直集賢院徂徠石介守道編進自任將至悔過凡十

二篇

尊號錄一卷

丞相安陸宋庠公序撰大意以爲徽號夸詡非古而我祖宗往往謙遜不居猶願超然遠覽盡屏前號其愛君以德者歟至神宗遂卻不受至於今行之

輔弼名對四十卷

天禧中前進士劉顏編自漢迄五代爲四十門

青社賑濟錄一卷

丞相富文忠公弼青州揀荒施行文牘也

元豐問事錄二卷

光祿寺丞李德芻撰德芻邯鄲李淑之子元豐中爲詳定官制檢討文字詔旨所問奏藁錄爲此書

官制局紀事一卷

李德芻奉旨編錄置局以來命官等事

中書備對十卷

太常丞檢正戶房公事管城畢仲衍夷仲撰凡一百二十五門附五十八事

呂申公掌記一卷

丞相申國呂公著晦叔撰在相位所記人材已用未用名姓及事當行已行條目

元祐榮觀集五卷

左朝奉大夫權太學正汪浹撰記元祐六年視學本末并羣臣所上詩賦頌表之類張舜民芸叟爲之序  
秦陵故事二十卷

不著名氏皆叙宣仁臨朝九年中制誥表章奏議之屬

四明尊堯集一卷

司諫延平陳瓘瑩中撰專辨王安石日錄之誣僭不孫與配食坐像之爲不恭瓘初在諫省未以安石爲非合浦所著尊堯集猶回隱不直末乃悔之復爲此書以謂蔡卞專用日錄以修神宗實錄薄神考而厚安石尊私史而壓宗廟以是編類其語得六十五條總而論之坐此羈管台州

尊堯錄八卷

延平羅從彥仲素撰從彥師事楊時而李侗又師從彥所謂南劍三先生者也從彥當靖康初以爲本朝

之禍起於熙豐不遵祖宗故事故採四朝事為此錄及李沆寇準王旦王曾杜衍韓琦范仲淹富弼司馬光程顥名輔巨儒十人言行附於其後末有別錄一卷專載司馬光論王安石陳瓘論蔡京奏疏欲上之朝不果嘉定中太守劉允濟得其書奏之且為版行本朝事實三十卷

右承議郎李攸撰案文獻通攷作李攸雜錄故事不成條貫統紀

皇朝治迹統類七十三卷

眉山彭百川叔融撰略用袁樞通鑑本末條例為前集四十卷中興後事為後集三十三卷

皇明事類樞要二百五十卷

蜀人張和卿編集為一百五十門蓋舉子答策之具也

東家雜記二卷

右朝議大夫孔傳撰歷代追崇先聖故事及孔林古跡傳蓋先聖四十七世孫也

長樂財賦志十六卷

知漳州長樂何萬一之撰往在鄞學訪同官薛師雍  
子然几案間有書一編大略述三山一郡財計而累  
朝詔令申明沿革甚詳其書雖爲一郡設於天下實  
相通問所從得薛曰外舅陳止齋修圖經欲以爲財  
賦一門後緣卷帙多不果入因借錄之書無標目以  
意命之曰三山財計本末及來莆田爲鄭寅子敬道  
之鄭曰家有向一之長樂財賦志豈此耶復借觀之  
良是其間亦微有增損末又有安撫司一卷併鈔錄  
附益爲全書

丙治聖監二十卷

起居舍人兼嘉王府贊讀清江彭龜年于壽撰取列  
聖修身齊家教子訓齊宗室防制外戚宦官誓御等  
事以紹熙五年表上之光宗稱善且曰祖宗家法最  
善漢唐所不及也

高宗聖政草一卷

陸游在隆興初奉詔修高宗聖政草創凡例多出其  
手未成而去私篋不敢留藁他日追記得此錄之而  
書其後凡二十條

高宗孝宗聖政編要二十卷

高宗聖政五十卷孝宗聖政五十卷乾道淳熙中所修皆有御製序此二帙書坊鈔節以便舉子應用之儲者也

孝宗聖政十二卷

亦書坊鈔節比前爲稍詳

會稽和買事宜錄七卷

浙東帥鄱陽洪邁景廬提舉常平三山鄭湜補之集初承平時預買令下守越者無遠慮凡一路州縣所

不受之數悉受之故越之額特重以匹計者十四萬六千九百居浙東之半人戶百計規免皆詭爲第五等戶而四等以上戶之害日益甚於是有爲畝頭均科之說者帥鄭丙少嘉憲邱崇宗卿張詔君卿頗主之由淳熙十一年以後略施行而議者多以勑科五等戶爲不便參政李彥穎秀叔尙書王希呂仲行先後帥越皆言之而王畫八事尤力會光廟亦以爲貽貧弱之害戶部尙書葉翥叔羽奏乞先減四萬四千餘匹止以十萬爲額而後議均敷詔從之仍令侍從

集議皆乞闕併詭挾案文獻通攷闕字作關誤遂詔邁湜措置既

畢以施行次第類成此書時紹熙元年也

劉忠肅救荒錄五卷

王居仁撰淳熙乙未樞密劉珙共父帥江東救荒本

末嘉定乙亥真景元刻之漕司以配富鄭公青社之

編而以劉公行狀謚議附錄於後

西漢會要七十卷東漢會要四十卷

武學博士清江徐天麟仲祥撰以二史所載漢家制

度典章散於紀傳表志者倣唐以來會要體分門編

纂其用力勤矣其言范蔚宗志藁為謝儼蠟以覆車

劉昭因蔚宗遺緒注而補之夫既曰蠟以覆車安得

復有遺緒蓋未攷昭之所著實司馬紹統續漢書志

也仲祥乙丑進士世有史學其世父夢莘商老著北

盟會編案著北盟會編者乃徐夢莘原本作夢莘誤今改正父得之思叔為左

氏國紀兄筠孟堅作漢官考皆行於世

漢制叢錄三十二卷案宋史藝文志作二十一卷文獻通攷作三十三卷

袁夢麟應祥撰以二漢所記典故分門編類凡二十

五門

平陽會四卷

通直郎知平陽縣汪季良子駟撰平陽號難治爲瀾東三陽之冠季良治有聲迺以一邑財計自兩稅而下爲二十一篇終於歲會旁通沿革本末大畧備矣又爲外篇五條如砧基副本催科檢放及書手除科數之類以爲此財用所從出也季良端明應辰之孫佳士且能吏也得年不永士論惜之

唐昌計二卷

案計字文獻  
通收作記

知昌化縣趙希至克家撰

直齋書錄解題卷五

